

En de Provinz va Trea't de presidenz va ARGE ALP 2024/25

Va de 25 van schanmikeal 2024 finz as de 24 van schanmikeal 2025 de autonome Provinz va Trea't bart sa' president van ARGE ALP, de örbetgamoaschöft van alpine region. De presidenz ist kemmen gem bail de 55^a konferenz van Arge alp, as hót se gahöhtn ka de Gottardo Arena va Ambri, 50 km nordlech va Bellinzona, bo der Canton Ticino, as ist president finz iaz gaben, hót gem de presidenz en de Provinz va Trea't. Ver de inser provinz sa' gaben de vicepresidenten va de Autonome Provinz va Trea't Francesca Gerosa, zömm pet en viarer van Dinst ver de Sprochminderheit ont de ausbendegen nètz Elisabetta Sovilla.

Arge Alp ist an örbetgamoaschöft as ist kemmen gamöcht en 1972 en Mösern, en Tirol, pet en zil za örbett no ont unterstützen de neat van lait ont van 10 lander as nemmen en toal: Taitschlont pet en Freistaat Bayern, Osterrach pet de Länder Vorarlberg, Tirol ont Salzburg, Balschlont pet de Autonome Provinzn va Poazn ont Trea't ont de Region Lombardia, de Schbaiz pet de Kantonen Graubünden, St. Gallen ont Ticino. De gamoaschöft enteressiert ungefer 26 milionen va lait. Gerosa hót toalnommen pet öndra derstert van 10 region va ARGE ALP en de 55^a Konferenz van viarer va regiurung. Bail en tréff ist kemmen vourstellt en de toalnemmer a relazion as de regiurung van bolf van an untersuach van Land Tirol. No en de vourstell hót klöfft de vicepresidenten Gerosa as hót pfrok za nemmen voor nèt lai der bolf ober de pern aa en de unersuachen van Arge alp ver za örbett olla zömm asn doi tema.

De hót pfrok za meing klöffen olla zömm van per bavai de noat ist za sa' olla zömm abia Alpn za örbett asn doi tema, hót tsöck de vicepresidenten.

De derstell va Arge Alp, vour za riven de konferenz, hom u'ganommen zboa risoluzionen. De earste keart

um en tema as ist kemmen tscherlt va de presidenz Canton Ticino 2024/2024 as ist s sélber regiar van bösse, as ist an bichtegen element ver za derhölt s lem as de Alpn.

Der tèckst va de risoluzion sok as ist runt bichte tauschen se s kenn zibischn de alpinen regionen ont vourtrong naia ideen. Iberhaupt en doi moment, as ist runt bichte der tema van bëcksl van klima, der zil ist za vinnen virm za meing prauch schubet ont praktisch en vòll van noat.

De zboate risoluzion keart aa um en tema van bëcksl van klima: s klöfft va de zömmörbet za nidern s riskiarn en de lander van Alpn ont za vinnen a strategi za tea' se mithèlven. Der Zömmtréff van Stött Viarer van ARGE ALP hót derno u'ganommen an dokument asn tema va de makroregional strategi ver de Qusalp va de EU. Zan leistn va de konferenz, hót se gahölt de praisautoal van prais ARGE ALP 2024: s praisgericht hót austschauk 19 projektn asn tema van aushöltlegregiar van bösse ont hót s gem de prais en earsn drai. Der earste prais ist kemmen gem en de Scuola Specializzata Superiore di Tecnica va Bellinzona ver en projekt van vèrrregiar van bösse van prinn; der zvate prais en de schual va de Lombardia Gargano ADV ver en projekt "AquaGuardi - Il Guardiano Digitale dell'Acqua"; der dritte prais en Sudtiroler Bauernbund ver en projekt "Wasser Pilot - Verpessar van bassern en de bisn-, pauer-, frucht- ont ba' merbirtschöft".

Der tema van 2025, as bart kemmen vourstellt van Trentin, bart sa' de projektn va lem, orbet ont bérkn van jungen as lem en pernglander.

EN TICINO HÖT SE GAHÖLTN DE 55^a KONFERENZ VAN DERSTELLN VAN 10 LANDER AS NEMMEN TOAL EN DE ÖRBETGAMOASCHÖFTN VAN ALPN. VER DE INSER PROVINZ IST GABEN DE VICEPRESIDENTEN GEROSA.



LORENZA GROFF

Druckomat PAT

Tolgamoaschöft : zboa bandi ver de studentn

DE SÈLLN AS SAI' ENTERESSIART MEING VINNEN DER MODELL VA DE VROG AS DE INTERNETSAT VAN OMT



La Comunità di Valle Alta Valsugana ha indetto due bandi per borse di studio e facilitazioni di viaggio per gli studenti. La domanda va presentata al Servizio Programmazione e Diritto allo studio della Comunità Alta Valsugana e Bersntol entro mercoledì 4 dicembre

De Tolgamoaschöft Hoa Valzegu' ont Bersntol hót garo ausgaleik zboa bandi ver de studentn. Der earste ist an prais ver de peistn studentn, der önder ist a zuazol as kimmep en gem ver en sèll as se spendiarn za gea' za schual.

Ver za meing ogem de vrog, de enteressiaret miasn gea' deréckt en sitz va de Tolgamoaschöft pet olla de dokumentn. Der bando ont der modell va de vrog, mu men sa vinnen af de internetsait va de Tolgamoaschöft, en olla de gamoa'n, en sitz va de tolgamoaschöft odr de meing pfrok kemmen pet an e-mail.

Men mias ausvillin de dokumentn pet olla de datn, der stönt va de familia, de schualont asou envire.

Der prais kimmep ausgem no en drai kriteri: de punktn van student en de schual, der stönt va de familia ont de kostn ver za gea' za schual. Der zuazol kimmep gem ver en sèll as men spendiart ver de schual: de kostn za gea' za schual, de piacher, sèll as men prächtzt za schraim se inn oder ver a zimmer ont za èssn ont asou envire.

Ver za meing nemmen toal de studentn miasn lem en a Gamoa' va de Tolgamoaschöft Hoa Valzegu' ont Bersntol, hom finz as 20 jor, inntschrifm sa' ver en earste vört en de sèll klasses ont hom an réchten Icef (as miasn sa' zibischn 0,00 ont 0,3529).

Der önder bando ist kemmen gamöcht ver olla de sèlln as miasn nemmen der auto oder an privatr pulmin ver za gea' za schual oder za nemmen de koriara (der plötz bo as geat

virpai de koriara oder de schual miasn almen aboa kilometre vèrr van haus van student sai').

De kriteri ver za nemmen toal sai' de glaichen: lem en a Gamoa' va de Tolgamoaschöft Hoa Valzegu' ont Bersntol, hom finz as 20 jor ont drinn stea en Icef.

De zuazol kimmep gem en de sèlln as gea' pet en sai' auto ont en de sèlln as zoln se sélber an pulmin. Men schauk olle der Icef va de familia, de kilometre as men möcht pet en auto ont der numer van roasn.

Ver za nemmen toal en peada de bandi, de studentn hom bail finz as de 4 van schantönderer um zeichena vra. Abia tsöck mias men vorraud de dokumentn ausvillin, döra u'mèln se en sitz va de tolgamoaschöft ont döra gea' ont möchen de domanda zömm pet an u'stellt va de tolgamoaschöft.

LORENZA GROFF

Kennen de bersntoler gamoaaschöft

S IST GARIFT DER PROJEKT VAN SCHUALER VA DE "ANDREATTA" VA PERSN

De Zboateschual "C. Andreatta" va Persn, bo as gea' de jungen van inser tol aa, hót toalnommen en projekt "Kennen de bersntoler gamoaaschöft," as ist kemmen organisiert ver za kennen se pesser en de schual ont abia gamoaaschöft ont ver za kennen de umbèlt as nèt asou vèrr ist. Der projekt as ist garift ist kemmen enviretrong van mitörberer van Bersntoler Kulturinstitut ont va de Gamoa' va Palai en Bersntol.

Laischiar olla de drauhundert schualer hom toalnommen en projekt as hót vour gahòp za kennen de gschicht, de sproch, de kultur ont de umbèlt van tol pet an programm as ist önders gaben ver an iata klasse van schualer.

De carstn klassn hom gameicht kennen, gèsgott aa en hefti "Do glaim en Bersntol", de gschicht van de inser gamoaaschöft, de örbet van pauer, de örbett en bòlt, de sog van Rindel.

De zboaten klassen hom gameicht pasuachen de ausstell "Klöffen, sprechen, parlare, durch s bersntolerisch" ver za meing studiarn de sproch. Derno sai' sa' gönzen za pasuachen der Filzerhof ont de hom gameicht kennen öndra temen abia de örbett ont de familia.

De schualer van dritt klassn hom studiart zboa bichtega temen ver de inser gamoaaschöft: s höndl ont de gruam. De hom gameicht gea' za sechen de museen s Pèrgmndlhaus ont de Gruab va Hardimbl.



LORENZA GROFF